



Ebazpena, 2025eko irailaren 11koa, Ikastetxe eta Plangintza zuzendariarena, 2023-2024 eta 2024-2025 ikasturtean DBHn gainditu gabeko jakintzagaien aparteko proba egiteari buruzkoa

Maiatzaren 3ko 2/2006 lege organikoak, Hezkuntzari buruzkoak (LOE), 5. artikuluan xedatutakoaren arabera, pertsona guztiek izan behar dute, hezkuntza-sisteman eta hezkuntza sistematik at, bizitzan zehar prestakuntza jasotzeko aukera, haien garapen pertsonal eta profesionalerako gaitasun, ezagutza eta trebetasunak eskuratu, gaurkotu, osatu eta zabaltzeko asmoz. Hezkuntza-sistemak etengabeko hezkuntza sustatzea du helburu, ikaskuntza beste ardura eta jarduera batzuekin bateragarria izan dadin erraztasunak emanez. Halaber, administrazio publikoek dute ikaskuntza malguaren eskaintzak sustatzearen ardura, hezkuntza sistema inolako titulaziorik gabe utzi zuten pertsonen oinarritzko gaitasunak eta titulazioak eskura ditzaten..

77/2023 Dekretuak, maiatzaren 30ekoa, Oinarritzko Hezkuntzaren curriculuma zehaztu eta Euskal Autonomia Erkidegoan ezartzen duenak Oinarritzko Hezkuntzaren berariazko curriculuma eta ebaluazioa ezartzen ditu Lehen Hezkuntzaren eta Derrigorrezko Bigarren Hezkuntzaren curriculuma ezartzen duen oinarritzko araubidea eragotzi gabe.

Dekretu horren 36. artikuluan ezartzen denez, ikastetxeek gainditu gabeko jakintzagaien probak antolatuko dituzte urtero Derrigorrezko Bigarren Hezkuntzako 4. maila amaitu ondoren Derrigorrezko Bigarren Hezkuntzako graduatu-titulua lortu ez duten ikasleentzat, hezkuntzaren arloan eskumena duen sailak ezarritako prozeduraren arabera.

Hori horrela, 2023-2024 eta 2024-2025 ikasturtean gainditu gabeko jakintzagaien ezohiko proben deialdia arautzen duten jarraibideak ematen dira, ikasleek Derrigorrezko Bigarren Hezkuntzako graduatu-titulua lor dezaten.

Hala ere, 2023-2024 eta 2024-2025 ikasturtean Derrigorrezko Bigarren Hezkuntzako graduatu-titulua lortu ez zuten ikasleentzako ezohiko proba denez, ikasturte horretan ikasturte bikoitietan indarrean zegoen curriculuma kontuan hartuta egingo dira probak.

Horregatik,

XEDATZEN DUT:





1.artikulua.- Xedea

Ebazpen honen xedea da 2023-2024 edo 2024-2025 ikasturtean Derrigorrezko Bigarren Hezkuntzako graduatu-titulua lortu ez duten ikasleen gainditu gabeko jakintzagaien aparteko proba ezartzea eta antolatzea.

2.artikulua.- Helburua

Hemen arautzen den aparteko probaren helburua jakintzagaiaren edo jakintzagaien oinarrizko konpetentziak eta helburuak lortzen dituztela frogatzen duten ikasleei gure hezkuntza-sistemako oinarrizko titulazioa lortzeko aukera ematea da.

3.artikulua.- Parte- hartzaileak.

2023-2024 edo 2024-2025 ikasturtean DBHko 4. mailan matrikulatuta egon eta Derrigorrezko Bigarren Hezkuntzako graduatu-titulua lortu ez duten pertsonak matrikulatu ahal izango dira probak egiteko, baldin eta 2025-2026 ikasturtean titulu hori lortzeko ikasketa ofizialetan matrikulatuta ez badaude.

4.artikulua.- Probak egingo diren datak eta tokiak.

Probak pertsona matrikulatuta egon den azken ikastetxean egingo dira. Azaroaren azken astean egingo dira, ikastetxearen egutegira egokituta. Probak ikastetxeko eskola-ordutegitik kanpo egingo dira, eta haien ordutegiak ikasleek gainditu gabe dituzten jakintzagai guztietara aurkezteko aukera emango die.

5.artikulua.- Matrikulazioa.

1.- Matrikulatzeko epea 2025eko urriaren 6tik 24ra, goizeko 13:00arte izango da.

2.- Matrikula pertsona matrikulatuta egon zen azken ikastetxean egin beharko da. Matrikula hori egiteko unean, ikastetxeak izangaiari prozeduraren berri emango dio, bai eta onartutako eta baztertutako matrikula-eskaeren zerrenda argitaratuko dela azalduko dio.

3.- Matrikulatzeko epea amaitu ondoren, ikastetxe bakoitzak bere iragarki-oholean jarriko du matrikulatutako pertsonen zerrenda, bai eta atzera bota diren pertsonen zerrenda ere adieraziz atzera bota izanaren arrazoiak.

4.- Matrikula egiteko behar den dokumentazioa

a) Nortasun agiriaren fotokopia.

b) Matrikulazio-orria (ebazpen honen I. eranskin gisa sartuta dagoen ereduaren arabera eta ikastetxeak emango duena). Orri horretan ikaslea 2025-2026 ikasturtean Derrigorrezko Bigarren Hezkuntzako Graduatuaren titulua lortzera bideratutako irakaskuntza ofizialetan matrikulatuta ez dagoela aditzera emateko adierazpen bat sartu beharko da.



6.artikulua.- Erreferentziako curriculum esparrua.

77/2023 Dekretua, maiatzaren 30ekoa, Oinarrizko Hezkuntzaren curriculum zehaztu eta Euskal Autonomia Erkidegoan ezartzekoa (2023ko ekainaren 9ko EHAA).

7.artikulua.- Ebaluazio- taldea.

Ebaluazio-taldea gutxienez epaimahaiburu batek eta jakintzagaia esleituta dagoen mintegiko bi kidek osatuko dute. Epaimahaiburuak epaimahaikideen artean izendatutako pertsona izango da idazkaria.

8.artikulua.- Ebaluazioa

1.- Proba bakoitza honela ebaluatuko da: Gutxiegi (G), Nahikoa (N), Ongia (O), Oso Ondo (OO) eta Bikain (Bk).

2.- Proba egin ondoren, ikastetxeko zuzendaritzak dagozkion aktak egingo ditu aplikazioan (kalifikazioak eta bertaratze-hutsegiteen aplikazioan), ikastetxean artxibatuko ditu 2025-2026 ikasturteko aktekin batera, eta horien kopia helaraziko dio Hezkuntza Ikuskaritzari.

9.artikulua.- Titulazioa

2023-2024 edo 2024-2025 ikasturtean ez gaindituta geratu ziren jakintzagai guztiak gainditzen dituztenek Derrigorrezko Bigarren Hezkuntzako graduatu-titulua eskuratzeko eskubidea izango dute, eta ikastetxeak aparteko proben ondoren egiten duen lehenengo titulu-proposamenean sartuko ditu, eta aparteko proba horietan egindako azken azterketaren data adieraziko du titulua lortzeko data gisa.

Vitoria- Gasteizen, sinadura elektronikoaren datan,

Eugenio Jiménez Ibáñez

IKASTETXE ETA PLANGINTZA ZUZENDARIA